

錦
帶
盧
忠
肅
公
書
健
餘
先
生
尺
牘
書



錦

帶

書

蕭
統
撰

中
華
書
局

叢書集成初編所選津逮秘書及學津討原皆收有此書
津逮在前故據以排印並附
學津本所載提要於後

錦帶書

太蔭正月

梁蕭統撰

伏以北斗周天。送玄冥之故節。東風拂地。啓青陽之芳辰。梅花舒兩歲之裝。柏葉汎三光之酒。飄飄餘籟。入簫管以成歌。皎潔輕冰。對蟾光而寫鏡。敬想足下。神遊書帳。性縱琴堂。談叢發流水之源。筆陣引崩雲之勢。昔時文會。長思風月之交。今日言離。永嘆參辰之隔。但某執鞭賤品。耕鑿庸流。沈形南畝之間。滯迹東臯之上。長懷盛德。聊吐愚衷。謹憑黃耳之傳。佇望白雲之信。

夾鍾二月

伏以節應佳辰。時登令月。和風拂迴。淑氣浮空。走野馬於桃源。飛少女於李徑。花明麗月。光浮竇氏之機。鳥弄芳園。韻響王喬之管。敬想足下。優游泉石。放曠煙霞。尋五柳之先生。琴尊雅興。謁孤松之君子。鸞鳳騰翮。成萬世之良規。實百年之令範。但某簾戶幽人。蓬門下客。三冬勤學。慕方朔之雄才。萬卷常披。習鄭元之逸氣。旣而風塵頓隔。仁智並乖。非無衰侶之憂。誠有離羣之恨。謹申數字。用展寸誠。

姑洗三月

伏以景逼徂春。時臨變節。啼鸞出谷。爭傳求友之音。翔藥飛林。競散佳人之翳。魚遊碧沼。疑呈遠道之書。

燕語彫梁。狀對幽閨之語。鶴帶雲而成蓋。遙籠大夫之松。虹跨澗以成橋。遠現美人之影。對茲節物。寧不依然。敬想足下聲馳海內。名播雲間。持郭璞之毫鸞。詞場月白。吞羅含之彩鳳。辯囿日新。某山北逸人。牆東隱士。龍門退水。望冠冕以何年。鷓鴣路。頽風想簪纓於幾載。既違語嘿。且阻江湖。聊寄八行之書。代申千里之契。

中呂四月

節屆朱明。晷鍾丹陸。依依聳蓋。俱臨帝女之桑。鬱鬱丹城。並挂陶潛之柳。梅風拂戶牖之內。麥氣擁宮闕之前。敬想足下聲聞九臯。詩成七步。涵蚌胎於學海。卓爾不羣。蘊抵鵲於文山。儼然孤秀。但某窮途異縣。岐路他鄉。非無阮籍之悲。誠有楊朱之泣。每遇秋風振響。鶉鷩子夏之衣。夜月流輝。鵲繞將軍之樹。既乖連璧之契。終隔斷金之情。中心藏之。卑誠至矣。今因去鴈。聊寄芻蕘。如遇回鱗。希垂玉翰。

蕤賓五月

麥隴移秋。桑律漸暮。蓮花汎水。黯如越女之頤。蘋葉漂風。影亂秦臺之鏡。炎風以之扇戶。暑氣於是盈樓。涼雨洗梅樹之中。火雲燒桂林之上。敬想足下追涼竹徑。託蔭松間。彈伯牙之素琴。酌嵇康之綠酒。縱橫流水。醅酩頽山。實君子之佳游。乃王孫之雅事。某沈疴漳浦。臥病泉山。頓懷劉幹之勞。鎮抱相如之酷。是知枯榮莫測。生死難量。驗風燭之不停。如水泡之易滅。聊申弊禮。以代勞人。佇覩芳詞。希垂愈疾。

林鍾六月

三伏漸終。九夏將謝。螢飛腐草。光浮帳裏之書。蟬噪繁柯。影入機中之鬢。溜枝遷而潦溢。芳槿茂而發榮。山土焦而流金。海水沸而漂燦。敬想足下藏形夜月。遁跡冰牀。披莊子之七篇。逍遙物外。玩老聃之兩卷。恍惚懷中。但某白社狂人。青緇末學。不從州縣之職。聊立松鶴之間。時假德以爲鄰。或借書而取友。三年之獨鶴。暫逐雞羣。九萬里之孤鵬。權潛燕侶。既非得意。正可忘言。諸不具申。應俟面會。

夷則七月

素商驚辰。白藏屆節。金風曉振。偏傷征客之心。玉露夜凝。直泣僊人之掌。桂吐花於小山之上。梨翻葉於大谷之中。故知節物變衰。草木搖落。敬想足下時稱獨步。世號無雙。萬頃澄波。黃叔度之器量。千尋聳幹。嵇中散之楷模。但某一介庸才。二隅頑學。懷經問道。不遇披雲。負笈尋師。罕逢見日。俛仰興嘆。形影自憐。不知龍前。不知龍後。鶯鶯雖異。風月是同。幸矣擇交。希垂影拂。

南呂八月

一嘆分飛。三秋限隔。遐思盛德。將何以伸。白雲斷而音信稀。青山暝而江湖遠。敬想足下羽儀勝侶。領袖嘉賓。傾玉醅於風前。弄瓊駒於月下。但某登山失路。涉海迷津。聞猿嘯而寸寸斷腸。聽鳥聲而雙雙下淚。當以黃花笑冷。白羽悲秋。既傳蘇子之書。更汎陶公之酌。聊因三鳥。路紆二難。面會取書。不能盡述。或叨風念。不黜魚緘。

無射九月

宿昔親朋平生益友。不謂窮通有分。雲雨將乖。旣深伐木之聲。更問采葵之詠。屬以重陽變敘。節景窮秋。霜抱樹而擁柯。風拂林而下葉。金堤翠柳。帶星采而均調。紫塞蒼鴻。追風光而結陣。敬想足下秀標東箭。價重南金。才過吞鳥之聲。德邁懷蛟之智。但某衡門賤士。壘牖微生。旣無白馬之談。且乏碧雞之辯。嘆分飛之有處。嗟會面以無期。聊申布服之言。用述併糧之志。

應鍾十月

節屆玄靈。鍾應陰律。愁雲拂袖。帶枯葉以飄空。朔氣浮川。映危樓而疊迴。胡風起截耳之凍。趙日興曝背之思。敬想足下山岳鍾神。星辰挺秀。潛明晦跡。隱於朝市之間。縱法化人。不混鄉閭之下。某陋巷孤遊。穿牆自活。終朝息爨。若孔子之爲貧。竟日停炊。如范生之在職。牛衣當被。畏見王章。犢鼻親操。恐逢犬子。雖此慚賤。而不羞貧。綺服有時。此言何述。

黃鍾十一月

日往月來。灰移火變。暫乖語嘿。頓隔秦吳。旣傳蘇李之書。更共范張之志。冷風盛而結鼻。寒氣切而凝唇。虹入漢而藏形。鶴臨橋而送語。彤雲垂四面之葉。玉雪開六出之花。敬想足下世號冰壺。時稱武庫。命長袂而留客。施大被以招賢。酌醇酒而拒切骨之寒。溫獸炭而祛透心之冷。某攜戈日久。荷戟年深。揮白刃而萬定死生。引虹旗而千決成敗。退龍劍而卻步。月下開營。進鯨鼓而橫行。雲前起陣。徒勞斬斫。豈用功勳。諸不具陳。謹伸微意。

大呂十二月

分手未遙。翹心且積。引領企踵。朝夕不忘。眷友思仁。行坐未捨。既屬嚴風極冷。苦霧添寒。冰堅漠地之池。雪積袁安之宅。敬想足下。棲神鶴駕。眷想龍門。披玩之間。願無損德。某種瓜賤士。賣餅貧生。入爨竈以揚聲。不逢蔡子。駕鹽車而顯跡。罕遇孫陽。徒懷叩角之心。終想暴腮之患。既爲久要。聊吐短章。紙盡墨窮。何能懇露。

休圃翁注錦帶序云。梁昭明太子錦帶。敘陳情事。啓發後人。淮南子曰。錦帶者。燦爛身之富也。實濟時之端。助文之備也。遂餒諸輩。以作兒曹月課。馬氏通考又云。梁元帝撰比事儷語。在法帖中。章草月儀之類也。余攷元帝紀。昭明太子傳。俱不載。未知確是誰作。坊刻昭明集中。題云十二月啓。或又云昭明方九歲時。述以錦帶十二。蓋法一年十二月之節令氣候也。豈永福省中祕笈。至元帝時。始流布人間耶。端臨與休圃翁時代不甚相隔。何抵牾至此。休圃翁杜姓。門名宋大觀間南湖人。注大繁冗未錄。第休圃翁序作于己丑正月一日。余跋適成于己丑正月一日。亦異事也。葵川毛晉識。



四庫全書提要

錦帶一卷。舊本題梁昭明太子蕭統撰。陳振孫書錄解題又云。梁元帝撰。比事儷語。在法帖中。章草月儀之類。詳其每篇自序之詞。皆山林之語。非帝胄所宜言。且詞氣不類六朝。亦復不類唐格。疑宋人案月令集爲駢句。以備箋啓之用。後來附會。題爲統作耳。今刻本昭明集中亦有之。題曰十二月啓。然昭明集乃後人所輯。非其原本。未可據以爲信也。

